

Puisinik illersuineq piniarnerlu pillugit Namminersorlutik Oqartussat nalunaarutaat nr. 16, 12. november 2010-meersumut ilitsersuut.

Ilitsersuutip siunertaa:

Ilitsersuut kommunit allanullu nalunaarummik atuisunut iluaqtissatut suliarineqarpoq. Piniarnermut atatillugu puisinik pinngortitamillu pitsaannerusumik illersuinissaq siunertaralugu nalunaarummi matumani manna tikillugu malittarisassanik arlalitsigut sukaterisoqarpoq. Tamatuma saniatigut ilitsersuummi siunertaq tassaavoq atuisunut ataasiakkaanut aamma ingerlatsivimmu, taassuma iluani aalajangersakkanik ataasiakkaanik ulluinnarni aqutsisunut naleqqiullugu nalunaarutip atuisussamut piuminarnernulernissaa. Ilitsersuut nalunaarummut piareersaatit ilaattut isigineqassaaq, aamma aalajangersakkat imarisaanut tunuliaqutaanullu ilisimatitsissutitut isigineqassalluni kiisalu nassuiaatinut ilassutitut atorneqassalluni. Ilitsersuut inatsisitigut pituttuisuunngilaq. Ilitsersuummi ”Naalackersuisoqarfik” allassimappat tamanna isumaqarpoq Aalisarnermut, Piniarnermut Nunalerinermullu Naalackersuisoqarfik aamma ”naalackersuisunut ilaasortaq” isumaqarpoq Aalisarnermut, Piniarnermut Nunalerinermullu Naalackersuisoq.



© Leif Fontaine

Imai

Ilitsersuummut tunngavilersuut	1
Imai.....	2
§ 1.....	3
§ 2.....	3
§ 3.....	3
§ 4.....	4
§ 5.....	4
§ 6.....	5
§ 7.....	5
§ 8.....	5
§ 9.....	6
§ 10.....	6
§ 11.....	6
§ 12.....	6
§ 13.....	7

§ 1

Imm. 1-2: Nalunaarut Kalaallit Nunaata nunataani imartamilu oqartussaaffigisaani Kalaallit Nunaanni atuuppoq. Nalunaarummi pineqarput puisinik illersuineq piniarnerlu, taamaalillunilu eqqissisimatitsinermut aalajangersakkanik kiisalu puisinniarnermi aalajangersakkanik imaqarluni.

Imm. 3: Nunat allanngutsaaliugassatut immikkoortitat pillugit nalunaarutininik atuuttoqarpoq (Kalaallit Nunaata avannaarsuani kangianilu Nuna Allannngutsaaliugassatut Immikkoortitaaq pillugu Namminersornerullutik Oqartussat nalunaarutaat nr. 7, 17. juni 1992-imeersoq) aamma Qimusseriarsuarmi uumasunik eqqissisimatitsivik pillugu (Qimusseriarsuarmi uumasunik eqqissisimatitsivik pillugu Namminersornerullutik Oqartussat nalunaarutaat nr. 21, 17. maj 1989-imeersoq, nalunaarut taanna januar 2010-mi Nunamut namminermut, Pinngortitamut Avatangiisinullu Naalakkersuisoqarfimmi nutarterlugu suliarineqarpoq). Nalunaarut una nalunaarutit taakku marluk naligalugit atuuppoq. Tamatuma saniatigut kommunini ileqqoreqqusat aqutigalugit annertunerusumik malittarisassaliortoqarsimasinnaavoq, taakkununga tunngaviusut § 9-miipput.

§ 2

Inuit taakku ilaasortaanissaannik piumasaqaatinik aalajangersaasoqarneratigut pissutsinut allanut naleqqiullugu inuit piniarsinnaatitaasut aalajangersakkami tassani killilerneqarput. Aalajangersakkami aalajangerneqarpoq inuit akuerisaasumik piniarnissamut allagartaqartut imaluunniit inuit akiliuteqarluni piniarnissamut allagartaqartut taamaallaat Kalaallit Nunaanni puisinniarsinnaasut. Inuussutissarsiutigalugu piniarnermut allagartaqarneq pillugu (Inuussutissarsiutigalugu piniarnermut allagartat pillugit Namminersornerullutik Oqartussat nalunaarutaat nr. 20, 27. november 2003-meersoq), sunngiffimmi aallaaniarsinnaanermut allagartaqarneq pillugu (Sunngiffimmi aallaaniarsinnaanermut allagartat pillugit Namminersornerullutik Oqartussat nalunaarutaat nr. 21, 28. november 2003-meersoq) aamma akiliuteqarluni aallaaniarnissaq pillugu (Akiliuteqarluni aallaaniarneq aalisarnerlu pillugit Namminersornerullutik Oqartussat nalunaarutaat nr. 22, 19. august 2002-imeersoq) nalunaarutininik atuuttunik peqarpoq.

Akiliuteqarluni aallaaniarneq paasineqassaaq tassaasoq sunngiffimmi aallaaniarneq, uumasunik aalajangersimasunik illersorneqartunik, eqqissisimatinneqartunik allatigulluunniit inatsisitigut malittarisassaqaartinneqartunik piniarnissamut immikkut akuersissuteqarnissamut akiliuteqarsimasut, piniarneq aallaaniarnerlu pillugit Inatsisartut inatsisaat nr. 12, 29. oktober 1999-imeersumi § 8 naapertorlugu. Inuit taakkuunerupput sunngiffimmi imaluunniit inuussutissarsiutigalugu piniarnissamut allagartaqanngitsut, taamatut immikkut akuerineqartartut, tassunga ilanngullugit takornarissat inatsisissatut siunnersuummi § 7-imut oqaaseqaatit malillugit.

§ 3

Imm. 1: Aallaaviatigut puisit tamarmik Kalaallit Nunaanni sumiluunniit piniarneqarsinnaapput. Piniarnerli nalunaarummi periutsit allanneqarsimasut aamma piniarfissatut aalajangersarneqarsimasup iluani taamaallaat ingerlanneqartussaavoq (tassa piffissat eqqissisimatitsiviusutut aalajangersarneqartut avataanni), §§ 3-6 naapertorlugu.

Imm. 2: ”Piaqqat” tassaapput puisit arnaviaminnik isumalluuteqartut. Pingaaruteqartoq taamaalilluni tassaavoq piaqqat arnaviaminnik ilaqarnerat. Arnavissat piaqqaminnik ingerlaqateqartut kiisalu piaqqat eqqissisimatineqavissuupput.

Imm. 3: Aataat, ussuit aamma natsit piaraat qaqortumik meqqoqarlutik piarartaarineqartarput. Piniarneq aatsaat aallartinneqarsinnaavoq meqqut taakku taarserneqarpata imaluunniit imm. 2-mi piffissap miluffiusup qaangiunnerata kingorna.

Imm. 4-5:

Qasigiaq puisi sigguttoorlu Kalaallit Nunaata nunataani imartamilu oqartussaaffigisaani 2010-mi decembarip aallaqqaataaniit eqqissisimatitaalerput, tamakkiisumillu eqqissisimatitsineq atatiinnarneqassalluni biologit nutaamik ilisimasaqalernerisigut eqqissisimatitsinissaq pisariaqarunnaarpat.

§ 4

Imm. 1: Unioqqutitsilluni pisat Pinngortitaleriffimmut, Boks 570, 3900 Nuummur tunniunneqassapput, Naalakkersuisoqarfimmut attaveqareernikkut, saaffiginnissut tassanngaanniit Pinngortitaleriffimmut ingerlateqqinneqassamat. Piniartumik isumaqatigiissuteqarnikkut nassiussinermi aningaasartuutit Pinngortitaleriffimmit akilerneqassapput.

Imm. 2-3:

Puiseqarsinnaavoq ilisimatusaatigalugu misissuineranut atatillugu qaammataasamat imaluunniit radiomut aallakaatitsissummik nalunaaqutserneqarsimasunik (imaluunniit taleqqumikkut nalunaaqutsersimasunik), taamaattumillu nalunaaqutaq il.il. tunniunneqarnissaat pingaaruteqarpoq, taamaalilluni oqartussat misissuineramik ingerlatsisut paasisutissanik pissarsinnaaqullugit. Aalajangersakkami tassani aalajangerneqarpoq, puisimik aallakaatitsissummik imaluunniit nalunaaqutserneqarsimasumik pisaqaraanni, aallakaatitsissut/nalunaaqutaq aalajangersakkami paasisutissat taaneqartut ilanngullugit Pinngortitaleriffimmut tunniunneqassaaq. Piniartumik isumaqatigiissuteqarnikkut nassiussinermi aningaasartuutit Pinngortitaleriffimmit akilerneqassapput.

§ 5

Puisinut pisassiissuteqarnissap atulerneqarnissaanik Naalakkersuisut aalajangiisinnaaneranni piniarnerup piujuartitsineramik tunngaveqartumik ingerlannissaa aamma puisit amerlassusaasa qulakkeerneqarnissaat eqqarsaatigineqarpoq.

Pinngortitaleriffimmiit biologinit siunnersuineq kingulleq tunngavigalugu aataat, natsersuit, natsit ussuillu pisarineqarnissaanut ”ammasumik pisassiissutinik” aalajangersaasoqassaaq. Ammasumik pisassiissoqarnissaanut tunngavilersuut tassaavoq manna tikillugu pisarineqartartut amerlassusaat pisuussutinik iluaquteqarnerup piujuartitsineramik tunngaveqarluni atunerup iluaniinneranik naatsorsuutigisaqarmat.

Imm. 1: Naalakkersuisut pisassiissutinik aalajangersaapput, soorlu aamma qilalukkanut qernertanut qaqortanullu pisassiissoqartartoq. Pisassiissutit annertussusissaannik aalajangiinnermi naalakkersuisunit eqqarsaatigineqartussat tassaapput nunani tamalaani isumaqatigiissutit isumaqatigiissutigineqarsimasut, biologit siunnersuinerat aamma atuisut ilisimasaat. ”Atuisut ilisimasaat” atituumik paasineqassaaq ilaatigullu innuttaasunit paasisutissanut tunngasuulluni. Pisassiissutit akuerineqarnissaat sioqqullugu Piniarneq pillugu Siunnersuisoqatigiinnut

tusarniutigineqassapput. Aalajangersakkami piniarneq aallaaniarnerlu pillugit Inatsisartut inatsisaat nr. 12, 29. oktober 1999-imeersumi § 2, imm. 3 aamma 4 malinneqarput, tassani takuneqarsinnaalluni piniarnermut aallaaniarnermullu tunngasutigut aqutsinermut atatillugu ilaatigut kattuffiit attuumassuteqartut kiisalu Piniarneq pillugu Siunnersuisoqatigiit aqutugalugit piniartut atuisullu ilisimasaasa ilanngunneqarnissaat pingaartinneqassasut, aamma Naalakkersuisut aqutsinerni piniartut atuisullu ilisimasaasa ilanngunneqarnissaat pillugu erseqqinnerusunik malittarisassiorsinnaasut.

Imm. 2: Pisassiissutit suaassutsit, ukiut iluini killilersorneqarsinnaapput, imaluunniit pisassiissutinut annikinnerusunut agguarneqarsinnaallutik. Killilersuisoqarsinnaavoq taamaalilluni piniarneq suaassutsip aappaannaanut ingerlanneqarluni, aalajangersimasumik utoqqaassusillit iluini ingerlanneqarluni aamma/imaluunniit pisassiissutinut annikinnerusunut agguarneqarluni. Piffissaq piniarfiususaaq imm. 4-mit takuneqarsinnaavoq.

Imm. 3: Pisassiissutit piumasaaqatillu akuerisaasut, taakkununga naleqqiullugu aalajangersarneqartut, piffissap piniarfissap aallartinnissaa sioqqullugu tamanut nalunaarutigineqartassapput. Paasissutissat Namminersorlutik Oqartussat nittartagaanni tamanit takuneqarsinnaapput: (www.nanoq.gl) aamma tusagassiutitigut nalunaarutikkut.

Imm. 4: Kalaallit Nunaat tamaat piffissaq piniarfissaaq allanneqarpoq.

§ 6:

Imm. 1:

Piniarnerup nalaani imaluunniit piniariartarfimmut siumut utimullu assartuutitut timmisartut, qulimiguullit, biilit motorillit (tassunga ilanngullugu qamuteralaat) atorneqaqqusaanngillat. Aalajangersakkami eqqarsaatigineqarpoq piniarneq ileqqoq malillugu ingerlanneqassasoq, tassa inuup kisimiilluni ingerlatissagaa, ullormut ataatsimut puisit ataasiakkaat pisarineqartarlutik. Aalajangersakkami siunertaq tassaavoq aamma pinngortitami sapinngisamik annikinnerpaamik akornusersuisoqarnissaa. Aalajangersagaq Piniarneq aallaaniarnerlu pillugit Inatsisartut inatsisaat nr. 12, 29. oktober 1999-imeersumi § 3, imm. 3 malillugu paasineqassaaq, tassani "angallatit imakkoorutit/nunakkoorutit" tassaatinneqarlutik "immakkut nunakkullu assartuutit suugaluartulluunniit piniarnermut, aallaaniarnermut aamma aalisarnermut atorneqartut imaluunniit piniarfimmut piniarfimmiillu assartuutitut atorneqartut".

Imm. 2: Taamaattorli qamuteralaat sikukut immikkullu aqutigineqarsinnaasutut toqqarneqarsimasukkut pisanik assartuutigineqarsinnaapput, uuttorniarnermi pisat minillugit, taakku upernaakkut allusiorluni piniarneqartarmata. Puisinniariaatsit allat taaneqarsinnaasut umiatsiamiit sikullu sinaanit aallaallugit qassusersorlunilu.

Imm. 3: Uumasup pisariaqanngitsumik anniartinnissaanik eqqarsaatigisaqarnermik aalajangersagaq tunngaveqarpoq, aamma Uumasunik illersuinerne inatsimmi § 1 naapertorlugu. Aallaasit atorneqartussatut piumasarineqarput 100 meteritut ungasissusilimmut aallaanermi E₁₀₀-mik minnerpaamik 160 J-imik sakkortussuseqassasut, 17 HMR-it kiisalu 22 magnum sakkortunerilluunniit atorneqarsinnaapput. Aamma timmiarsiut minnerpaamik 20-mik sakkortussusilik puisinniarnermi atorneqarsinnaavoq. Taakku tamakkiisumik affaannarmilluunniit eqttagaassanngillat. Imassat akisussaassuseqartumik toqqarneqarnissaat piniartut ataasiakkaat akisussaaffingivaat. Niuerfinni ineriartortoqartuarnera eqqarsaatigalugu imassat qanoq ittut atorneqarnissaat pillugu aalajangersakkamik ilanngussisoqanngilaq, imassallu sapinngisamik

pitsaanerpaat tamatigut piniartunit ataasiakkaanit atorneqartarnissaat siunertaavoq, taamaalilluni puisi annikinnerpaamik anniartinneqarluni. Aallaasit tamakkiisumik affaannarmilluunniit eqittagaannginnissaannik piumasaqarneq piniarneq aallaaniarnerlu pillugit Inatsisartut inatsisaat nr. 12, 29. oktober 1999-imeersumi § 9, imm. 1-imut atatillugu isigineqassaaq.

Imm. 4-6: Aalajangersakkami pingaarnertut siunertaq tassaavoq Kalaallit Nunaata avannaani tunumilu inuit ukiukkut inuuniarnikkut tunngaveqarnissaannik illersuinissaq, tamaani kaperlaap nalaani natsit annerusumik pisarineqartarmata. Kalaallit Nunaata ilaani tamaani qassusersorneq piniarnermi atorneqartutuaavoq. Qassutit qanoq ittuunerinik, nalunaaqutsersuinerullu kiisalu piniarnerup kingorna qassutinik qaqitsinerup pingaaruteqassusianik erseqqissaavoq. Kommunalbestyrelse piniariaatsimut tassunga sukumiinerusumik maleruagassaliorsinnaavoq kommunimut ileqqorequsaliornikkut, takuuk § 12.

§ 7:

Imm. 1: Piujuartitsinermik tunngaveqarluni puisimik iluaquteqarnissaq aalajangersakkami tassani eqqarsaatigineqarpoq, tassa puisip tamakkiisumik iluaqutigineqarnera. Puisip pisarineqartup sapinngisamik annertunerpaartaata atorneqarnissaa qimaannarneqannginnissaalu qulakkeerneqassaaq, taamaattumik aalajangersagaq malillugu puisit amiiginnarlugit qimanneqarnissaat inerteqqutaavoq; taakku sinnerilu atorneqarsinnaanngitsut toqqorneqassapput imaluunniit iginneqassallutik, piniariarfik qimatsinnagu.

Imm. 2: Qimatulivik pisariaqartinneqarpat, tamanna najukkami piniarnermut aalisarnermullu nakkutilliisumut nalunaarutigineqassaaq.

§ 8:

Imm. 1: Piniarnerup piujuartitsinermik tunngaveqarluni ingerlanneqarnissaa pingaaruteqarpoq, pisat ukiumoortumik nalunaarsuinissamut immersuiffikkut *Piniarneq*-mut nalunaarutigineqarlutik. Pisanik nalunaarsuiffiup tunniunneqarnissaanut piumasaqaat Inuussutissarsiuutigalugu piniarnermut allagartat pillugit Namminersornerullutik Oqartussat nalunaarutaat nr. 20, 27. november 2003-meersumi § 10-mi aamma Sunngiffimmi aallaaniarsinnaanermut allagartat pillugit Namminersornerullutik Oqartussat nalunaarutaat nr. 21, 28. november 2003-meersumi § 8-mi takuneqarsinnaavoq. Pisat taamaalillutik Kalaallit Nunaanni pisat tamarmik pillugit kisitsisitigut paasissutissanut ilaassapput. Kisitsisit taakku aamma nunat tamalaat akornanni puisit amerlassusaannik, piniarnerup annertussusianik sumiiffinnilu agguataarnerisa nalilersorneranut atatillugu atorneqassapput.

Piniarneq aqutugalugu piniarnermut allagartaqarnikkut pisanik nalunaaruteqartarnermi siunertaq tassaavoq nunami pisassatigut pisuussutinik qulaajaanissaq, pisuussutinik iluaquteqarnermik nakkutiginninnerup kiisalu paasissutissat katersorneqartut ilisimatusarnikkut suliarineqarnerisa pitsaanerulernissaat siunertaralugu.

Imm. 2 -3: Periutsit, peqqussutit innersuussutillu aalajangersakkanut atasut iluaqutigalugit *imm. 1*-imi malinneqartut anguniakkat anguneqarnissaasa piviusunngortinneqarnissaat aalajangersakkami siunertaavoq.

§ 9:

Imm. 1: Piniagassat tamarmik illersorneqarnerat assut pingaartinneqarmata sumiissusilersuineq nalunaaqutsinerlu Naalakkersuisunut ilaasortamit akuerineqassapput, Pinngortitaleriffimmit taakku suliarineqanngippata. Taamaalilluni Naalakkersuisunut ilaasortaq taamatullu Naalakkersuisoqarfik

puisunut tunngatillugu ilisimatuussutsikkut misissuinerit pillugit ingerlaavartumik ilisimatinneqartassaaq. Aalajangersagaq atorneqartussannugussaaq biologit ilisimatuussutsikkut misissuinerminni puisinik ilisimajunnaarsitsinialissagaluarunik, assersuutigalugu puisu nalunaaqutsernialernerani allatulluunniit uumasunik avatangiisinillu misissuinermut atatillugu misissorneqalissaguni.

§ 10:

Naalackersuisunut ilaasortaq akuersissuteqartinnagu puisit aamma uumasuutigineqaqqusaanngillat. Aalajangersakkat taakku uumasunik illersuinissamut inatsimmut atatillugu isigineqassapput aamma nunatsinni puisit assigiinngitsutigut naalliutsinneqarnerinut soorlu sakkortuumik niuernikkut assigisaatigulluunniit atorneqarnerinut illersuinissaq siunertarineqarluni.

§ 11:

Puisit assigiinngitsut marluusut tamakkiisumik eqqissisimatinneqarnerisigut, puisit uumatillugit taakkunanngaluunniit tunisassianik annissiniarneq nakkutigisariaqarpoq, tamanna ilisimatuussutsimut, ilinniartitsinermut kulturimulluunniit siunertaqaraluarpata Aalisarnermut, Piniarnermut Nunalerinermullu Naalackersuisoqarfimmit sioqqullugu akuersissuteqarnissaq pisariaqarpoq. Taamaattorli ammit iluitsut ilanngakulluunniit kalaallisuumut atorneqartut minillugit. Puisinit tunisassianik Kalaallit Nunaaninngaanniit annissinissamut atatillugu nunat eqqussiffiginiakkat inatsisaat eqqumaffigisariaqarput, ilaatigut tamatumunnga tunngasut Europami Naalagaaffiit Suleqatigiiffianni nalunaaqutsersuineq pillugu inatsisiliornerat 20. august 2010-meersoq sukangavoq, takuuk peqqussut (EF) nr. 1007/2009 aamma EU'p ataatsimut tunitsiviini puisinit tunisassianik inissiisinnaaneq pillugu (EF) 737/2010.

§ 12:

Nalunaarummi matumani pinngortitamik / nunamik eqqissisimatitsinermut malittarisassanik imaqartut nalunaarummi pingaarnertigut siunertap malinneqarnissaanut minnerpaatut piunasaqaatitut taamaallaat isigineqassapput. Kommunit ataasiakkaat imaluunniit kommunit arlallit ataatsimoorlutik taamaattumik qulaani taaneqartumi inatsisartut inatsisaanni § 8, imm. 1-3 malillugu, ileqqoreqqusaliornikkut, sukanganerusunik killilersuinissamut aamma natsit eqqissisimatinnissaanut piunasaqaateqarnissamut, aamma qassutit atorneqarnissaannut piginnaatinneqarput, nalunaarummi matumani § 6, imm. 4 naapertorlugu, kiisalu kommunip iluani nunani aalajangersimasuni piniarnermut malittarisassaliornissamut. Kommunalbestyrelsi taamaalilluni annertunerusumik killilersuinernik aalajangersaasinnaavoq kiisalu kommunip iluani nunani aalajangersimasuni piniarnermut malittarisassaliorsinnaalluni. Nunaqarsinnaavoq immikkut sunnertiasunik, assersuutigalugu piniariaaseq sukateriffigineqarsinnaalluni, imaluunniit avatangiisit immikkut eqqarsaatigineqartariaqarlutik. Kommunimi ileqqoreqqusat Naalackersuisunut ilaasortamit atortussanngortinneqassapput.

§ 13:

Aalajangersagaq taanna nalunaarummi aalajangersakkanit ataasiakkaanit Naalackersuisoqarfiup immikkut akuersisarnissaanut nalunaarutip matuma piviusut aallaavingalugit aqutsinissamik siunnerfeqarpoq. Ilisimatusarnikkut misissuinissat imaluunniit nunatsinni pisuussutinik uumassuilinnik misissuinissat eqqarsaatigalugit pisuni ataasiakkaani immikkut akuersisoqassappat taamatut piunasaqaateqartoqarpoq. Pisuni immikkut akuersiffiusinnaasunut assersuutitut inatsisissatut siunnersuummi § 11-mut oqaaseqaatini allanneqarput manna tikillugu piniariaatsit aamma sakkut toqutseriaatitut imaluunniit sakkutut naleqquttuunerinik aalajangiisoqarnissaanik

pisariaqartitsinerit. Inatsisissatut siunnersuummi § 11-mut oqaaseqaatinit takuneqarsinnaasoq assersuut alla tassaavoq nunatsinni piniakkatigut pisuussutinik qulaajaanermut atatillugu uumasunik pisaqartoqartillugu nalunaarummi aalajangersakkanit ataasiakkaanit immikkut akuersisoqarsinnaanera.

Inatsisartut inatsisaat nr. 12, 29. oktober 1999-imeersumi § 11 naapertorlugu aalajangersagaq atuarneqassaaq. Immikkut akuersiniartoqartillugu, immikkut akuersisoqartinnagu, suliami naliliinerat pillugu Pinngortitaleriffik tusarniaaffigineqaqqaassaaq.

§ 14:

Paragraffimi pineqarpoq nalunaarummi aalajangersakkanik taaneqartunik unioqqutitsinerit pillugit pineqaatissiinerit. Aalajangersakkanik taaneqartunik unioqqutitsisoqartillugu inatsimmik unioqqutitsisoq akiliisinneqarsinnaavoq. Imm. 1 naapertorlugu aamma arsaarinnittoqarsinnaavoq. Pinerluttulerinermi inatsimmi malittarisassat tunngavigalugit arsaarinnittoqarsinnaavoq.

Nalunaarut malillugu kommunimi ileqqoreqqusat atulersinneqarsimasut ileqqoreqqusanik unioqqutitsinerit akiliisitsinermik arsaarinninnermillu aalajangersagaqarpata tamatumunnga periarfissaqarpoq. Ileqqoreqqusami tamanna pillugu aalajangersagaqassaaq.

§ 15:

Imm. 2: Qasigissat eqqissisimatitaanerit pillugu Landsrådip ileqqoreqqusaa 31. august 1959-imeersoq, 12. februar 1960-imi atulersinneqartoq matuma nalunaarutip atulersinneqarnerata peqatigisaanik atorunnaarsinneqarpoq.

Imm. 3-4:

Qasigissanik eqqissisimatitsineq pillugu Landsrådip ileqqoreqqusaa 31. august 1959-imeersoq naapertorlugu allatigullu kommunit ileqqoreqqusaanni aalajangersarneqartut imaluunniit allakkiat nassiinneqarsimasut atortuugallassapput puisinniarnermut annerusumik piunasaqaatitaqarunik, atorunnaassallutillu kommunit ileqqoreqqusaliaat nutaat atortussanngortinnerisigut. Taakkuattaq allatigut nalunaaruteqanngikkaluarluni kingusinnerpaamik 31. december 2014 atorunnaarsinneqassapput. Kommuneni iluarsaasseqqiisoqarnikummat, kommunit tamarnik puisinniarneq pillugu nutaanik ileqqoreqqusaliorariaqarput.

Nalunaarut 1. december 2010 atuutilerpoq.